



## **ORDENANZA Nº 19:**

# **ORDENANZA FISCAL REGULADORA DAS TAXAS POLA PRESTACIÓN DOS SERVIZOS DE SANIDADE PREVENTIVA, DESINFECCIÓN, DESINSECTACIÓN, DESRATIZACIÓN E DESTRUCCIÓN DE CALQUERA CLASE DE MATERIAS E PRODUTOS CONTAMINANTES OU PROPAGADORES DE XERMES NOCIVOS PARA A SAÚDE PÚBLICA PRESTADOS A DOMICILIO OU POR ENCARGO**

**—2019—**



## ARTIGO 1.- FEITO IMPOÑIBLE.

Constituirán feitos impoñibles destas taxas:

- a) A prevención e control hixiénico-sanitario e desinfección, no seu caso, a realizar segundo o esixan as circunstancias, con motivo da primeira utilización ou ocupación de vivendas ou locais.
- b) A prevención e control hixiénico-sanitario e desinfección e desinsectación, no seu caso, a realizar segundo o esixan as circunstancias, ó menos unha vez ó ano, sobre as condicións de salubridade, sanidade e hixiene dos edificios e lugares públicos a que se refire a Orde 6 de outubro de 1965.
- c) A prevención e control hixiénico-sanitario e desinfección e desinsectación, no seu caso, das vivendas ou locais que queden desalugados ou baleiros, antes da súa segunda ou sucesivas ocupacións por novos moradores ou usuarios, ou cando en aqueles se producise ou se produza algún caso de doenza infecto-contaxiosa, neste caso desinfectaranse tamén as roupas usadas polos doentes.
- d) A desinfección e desinsectación, no seu caso, do mobiliario, roupas e efectos usados, adquiridos para o comercio de compravenda, inmediatamente despois da súa adquisición polos industriais.
- e) A desinfección e desinsectación, no seu caso, dos fardos ou vultos de farrapo ou papel usado que entren ou saian do termo municipal.
- f) A desinfección e desinsectación, no seu caso, dos vehículos autotaxis a que se refire o artigo 60 do vixente Regulamento Municipal de Servizos de Transporte Urbano de Automóbiles lixeiros.
- g) A desinfección e desinsectación, no seu caso, dos vehículos de viaxeiros adscritos ó servizo de transporte urbano colectivo, nos termos da concesión administrativa outorgada.
- h) A desratización, só no caso de que por esixilo a salubridade ou sanidade pública se determine polas autoridades sanitarias ou municipais.
- i) O control hixiénico-sanitario dos vertedoiros de refugallos ós que se refire a Lei 10/98 de 21 de abril, Xeral de Residuos e disposicións complementarias.
- j) A inspección, só nos casos de que se trate de comproba-la eficacia das operacións reguladas na presente ordenanza ou en comprobación de posibles infraccións das Ordenanzas ou Regulamentos sanitarios vixentes.

## ARTIGO 2.- SUXEITOS PASIVOS

Son suxeitos pasivos, obrigados ó pagamento das taxas reguladas na presente ordenanza, as persoas físicas ou xurídicas que ostenten a condición de propietarios dos inmobles relacionados nos apartados a) a j) do artigo anterior, as persoas a quen beneficie o servizo prestado, ou o soliciten e aquelas persoas afectadas nos casos en que por precepto legal ou regulamentario, orde governativa ou cumprimento de resolucións do Alcalde ou Acordo do Concello, se verifiquen inspeccións e se presten os servizos sinalados na presente ordenanza.

## ARTIGO 3.- EXENCIÓNS E BONIFICACIÓNS

En materia de exencións e bonificacións de taxas por prestación de servizos, non poderán recoñecerse outros beneficios fiscais que os expresamente previstos en normas de rango legal e tratados internacionais.



a) Estarán exentos das taxas reguladas na presente ordenanza, os suxeitos pasivos membros de familias con ingresos brutos anuais per cápita inferiores a 4.064 €. A titularidade de Bens Inmóveis de Natureza Urbana, a excepción da vivenda na que residen, non deberá superar un valor catastral total de 49.305 €.

Para a determinación dos Ingresos Brutos anuais per cápita teranse en conta as seguintes normas:

1.1 O ingreso bruto anual per cápita calcularase dividindo a totalidade dos ingresos brutos anuais da unidade familiar entre o número de integrantes. No caso dun menor de 25 anos cun grao de discapacidade superior ao 65% computarase como se foran dúas persoas. No caso de que o grao de discapacidade estivese entre 33% e 65% computarase como 1,5.

1.2 No caso de persoas maiores de 65 anos, aplicarase aos seus ingresos brutos o coeficiente 0,50.

1.3 No caso de que o suxeito pasivo desta taxa resida só nunha vivenda aplicarase aos seus ingresos brutos o coeficiente 0,55.

1.4 No caso de que se dean simultaneamente as dúas circunstancias referidas nos dous parágrafos anteriores, aplicarase o coeficiente 0,35.

1.5 No caso de que o suxeito pasivo sexa unha persoa vítima de violencia de xénero acreditada mediante sentenza firme, aplicarase aos seus ingresos brutos o coeficiente 0,35. Este coeficiente será de aplicación durante os primeiros 5 anos contados dende a data da sentenza.

1.6 No caso de que o suxeito pasivo sexa un/a titor/a monoparental, único perceptor de ingresos e os fillos non tiveran rematado o ensino obrigatorio, aplicarase aos ingresos brutos o coeficiente 0,55.

Poderá aplicarse este coeficiente no caso de que os fillos percibiran prestacións de carácter público con motivo de discapacidade, invalidez e similares.

1.7 No caso de suxeitos pasivos que tendo cargas familiares levasen en situación de desemprego mais de 22 meses ininterrompidos, aplicarase aos seus ingresos brutos un coeficiente do 0,35.

1.8 No caso de suxeitos pasivos en situación de "dependencia en calquera dos seus graos", aplicarase aos seus ingresos un coeficiente do 0,50.

1.9 No caso de suxeitos pasivos dependentes do apartado 1.8 que fosen maiores de 65 anos aplicarase un coeficiente do 0,35.

1.10 No caso de suxeitos pasivos do apartado 1.8 que fosen maiores de 65 anos e residan soas aplicarase un coeficiente do 0,30.

Para o desfrute desta exención debera solicitarse expresamente e autorizar ao Concello para que recabe a información sobre os ingresos de todos os integrantes da familia á AEAT e a outras administracións públicas e certificado de discapacidade se é o caso.

b) Estarán exentos do pagamento das taxas reguladas nesta ordenanza os suxeitos pasivos membros de familias que teñan a condición de familias numerosas, con ingresos brutos anuais per cápita inferiores a 6.360 €.

O ingreso bruto anual per cápita calcularase dividindo a totalidade dos ingresos brutos anuais da unidade familiar entre o número de integrantes. No caso dun menor de 25 anos cun grao de discapacidade superior ao 65% computarase como se foran dúas persoas. No caso de que o grao de discapacidade estivese entre 33% e 65% computarase como 1,5.



Para desfrutar desta exención deberán achegarse á solicitude os seguintes documentos:

- Título de familia numerosa vixente a 1 de xaneiro do exercicio en que deba surtir efectos a exención.
- Autorización ao Concello para que recabe a información sobre os ingresos de todos os integrantes da familia da AEAT e outras administracións públicas.
- Certificado de discapacidade se é o caso.

#### ARTIGO 4.- COTAS

As tarifas destas taxas serán as seguintes:

##### 1. DESINSECTACION

- 1.1. Por cada actuación nunha vivenda ou local;  
polos primeiros 25 m2. 24,60 €
- 1.2. Por cada m2 a maiores 0,65 €

##### 2. DESRATIZACIÓN

- 2.1. Por cada actuación nunha vivenda ou local;  
polos primeiros 50 m2. 24,60 €
- 2.2. Por cada 50 m2 a maiores 6,50 €

##### 3. DESINFECCIÓN

- 3.1. Por cada actuación nunha vivenda ou local;  
polos primeiros 25 m2. 24,60 €
- 3.2. Por cada m2 a maiores 0,65 €

##### 4. VEHÍCULOS

- 4.1. Por desinfección autotaxi. 9,65 €
- 4.2. Ídem. autobuses transporte urbano. 19,30 €
- 4.3. Ídem. camión, autobús ou transporte de mobles. 28,05 €

A prestación de servizos realizados fóra do horario normal de traballo sufrirá un recargo do 50% sobre as tarifas sinaladas.

#### ARTIGO 5.- DEVENGO E INGRESO

1. As taxas reguladas nesta Ordenanza devengarase no momento da solicitude do servizo.
2. Os solicitantes realizarán simultaneamente coa solicitude autoliquidación e ingreso da cota correspondente segundo as tarifas do artigo 4º.
3. A Administración de Tributos Municipal practica a requirimento do Servizo de Laboratorio a liquidación complementaria que correspondese en caso de que a practicada polo solicitante fose incorrecta.
4. Cando por causas non imputables ó suxeito pasivo, o servizo non se preste, procederá a devolución do importe ingresado.



## ARTIGO 6.- INFRACCIÓNS E SANCIÓNS

No relativo a infraccións tributarias desta Ordenanza, a súa cualificación así como ás sancións procedentes estarase ó disposto na Ordenanza Fiscal Xeral do Concello, Lei 58/2003 Xeral Tributaria, e restante normativa de aplicación.

## ARTIGO 7.- NORMAS ADICIONAIS

1. Os servizos e operacións de desinfección, desinsectación, desratización e destrución de materias ou produtos contaminantes, practicaranse ben polo Laboratorio Municipal ou por empresas dedicadas a tales traballos que obtivesen conforme á lexislación vixente, as autorizacións oficiais correspondentes á categoría de “empresa autorizada”.
2. As empresas ou entidades autorizadas quedarán suxeitas ó disposto no Regulamento de Actividades Nocivas, Molestas, Insalubres e perigosas de 30 de novembro de 1961.
3. Cando realicen algún dos servizos ou operacións, as empresas ou entidades autorizadas, darán conta á Alcaldía, cunha antelación mínima de oito días, do lugar, día e hora en que han de realiza-los mencionados servizos, co fin de que a Alcaldía ou Laboratorio Municipal, no seu caso, envíen un Inspector especializado que deberá realiza-lo control de tales operacións e da eficacia das mesmas.
4. Na realización do control do servizo, o Inspector do Concello comprobará ou recollerá os seguintes datos:
  - a) Composición dos equipos da empresa.
  - b) Vixencia dos carnés e estado sanitario dos seus titulares.
  - c) Medidas de protección dos desinsectores.
  - d) Ferramenta e técnicas de aplicación.
  - e) Desinsectantes utilizados.
  - f) Observacións que formulen os usuarios.

## ARTIGO 8.-

1. Cando se trate de segundas ou sucesivas ocupacións de vivendas ou locais, que queden desalugados ou baleiros procederase da seguinte forma:
  - a) Os titulares de vivendas ou locais solicitarán autorización para a ocupación dos mesmos en modelo impreso, que ós efectos se facilitará no Rexistro Xeral do Concello.
  - b) Coa solicitude, os interesados deberán achegar e depositar unha chave da respectiva vivenda ou local a fin de que os facultativos dos Servizos Sanitarios Locais e o persoal do laboratorio municipal, practiquen no seu caso, os servizos declarados obrigatorios pola presente ordenanza.
  - c) Efectuadas as operacións e servizos de prevención e control hixiénico-sanitario e as de desinfección e desinsectación, no seu caso, polos facultativos dos Servizos Sanitarios Locais e o Laboratorio Municipal, a chave será entregada en dito laboratorio ós interesados que asinasen o modelo impreso.
2. Os propietarios, rendeiros, usufrutuarios ou administradores de vivendas que queden desalugados ou baleiros non poderán utilizados por sí, ceder o uso a outra persoa, nin alugalos, sen obter a previa autorización do Concello, que non se concederá sen que se acredite terse practicado os servizos obrigatorios de prevención e control hixiénico-sanitario de ditas vivendas e locais, e os de desinfección e desinsectación no seu caso.



3. As persoas mencionadas no número anterior están obrigadas a comunica-las circunstancias de ter quedado desocupados os pisos, vivendas ou locais, dentro do mes seguinte ó de producirse a desocupación.

4. Practicados os servizos e operacións a que se refire o apartado c) do artigo 1, no interior da vivenda ou local, o laboratorio municipal estará obrigado a colocar un rótulo, co selo de dito laboratorio e a inscrición “recoñecido e desinfectado” e a continuación a data na que se efectuou a operación ou servizo.

#### ARTIGO 9.-

1. Os ocupantes ou alugueiros das vivendas ou locais nos que se producise algún caso de doenza infecto-contaxiosa están obrigados a comunicalo de inmediato, ó laboratorio municipal a fin de que se realicen os servizos ou operacións de desinfección que procedan.

2. A obriga sinalada no apartado anterior, alcanza tamén ós facultativos que asistisen ou asistan ó doente.

3. Os condutores ou titulares de vehículos de servizo público de transporte de viaxeiros ou particulares que conducisen doentes infecto-contaxiosos están obrigados a comunicalo o mesmo día ó laboratorio municipal, a fin de que se realicen os servizos ou operacións de desinfección que procedan.

#### ARTIGO 10.-

1. Os industriais, comerciantes, vendedores de mobiliario, roupas e efectos usados adquiridos para o comercio de compravenda están obrigados a comunicar ó laboratorio municipal as partidas de efectos ou mobiliario adquiridos, dentro dos dous días seguintes á data de recepción, a fin de que se practiquen os servizos e operacións de desinfección que procedan.

2. Para a prestación dos servizos sinalados no apartado d) do artigo 1, o persoal do laboratorio de oficio, poderá persoarse cantas veces estime oportuno, nos locais ou establecementos dos devanditos industriais, comerciantes ou vendedores a fin de practica-las operacións ou servizos de desinfección que procedan. En tódolos casos, colocará nos mobles, fardos de roupa e efectos usados o mesmo rótulo a que se refire o nº4 do artigo 8, sen prexuízo da aplicación ós interesados das sancións de policía ou outras que procedan por infracción das Ordenanzas ou Regulamentos Sanitarios ou das obrigacións contidas na presente ordenanza.

#### ARTIGO 11.-

1. Os industriais, comerciantes ou vendedores de fardos ou vultos de farrapo ou papel usado a que se refire o apartado e) do artigo 1, están obrigados a comunicar ó laboratorio municipal coa suficiente antelación, no caso de expedicións de saída, ou no mesmo día, no caso de expedicións de entrada, cada unha das que, por separado, envíen fóra do termo municipal ou reciban nos seus almacéns, locais ou establecementos.

2. Aplicarase a estas expedicións o disposto no nº 2 do artigo 10.

3. As empresas de transporte non poderán facturar fóra do termo municipal fardos ou vultos de farrapos ou papel usado, sen que o remitente xustifique con exhibición do rótulo correspondente, terse procedido ós servizos e operacións de desinfección e desinsectación no seu caso.



### ARTIGO 12.-

A Alcaldía, dentro das súas competencias ou a Xunta de Goberno Local, no seu caso, disporá, a data e prazos en que efectuarán as operacións e servizos que afectan ós vehículos ou vertedoiros a que se refiren os apartados f), g) e h) do artigo 1.

### ARTIGO 13.-

1. As empresas subministradoras de augas, gas e electricidade non poderán formalizar ningún contrato definitivo de subministro sen que polo solicitante se presente o rótulo do laboratorio municipal ou documento que acredite terse efectuado nos locais, establecementos, pisos e vivendas os servizos de prevención e control hixiénico-sanitario e os de desinfección e desinsectación no seu caso, ou se xustifique a súa exención.

2. O incumprimento do disposto no nº anterior poderá ser sancionado pola Alcaldía na forma disposta na Lei 7/85 de 2 de abril de Bases de Réxime Local.

### ARTIGO 14.-

1. A dirección do laboratorio municipal estará abrigada a levar, como mínimo, un libro ou rexistro, no que se consignarán claramente, sen raspaduras, tachaduras ou enmendas, os seguintes datos:

- a) Número de orde do servizo practicado
- b) Nome e apelidos do solicitante interesado
- c) Domicilio do solicitante interesado e no seu caso, o domicilio no que se practicase o servizo ou inspección
- d) No seu caso, Autoridade, Centro Oficial ou funcionario que ordene o servizo.
- e) Data de prestación do servizo
- f) Clase de servizo efectuado, con expresión do concepto que corresponda conforme á tarifa da ordenanza
- g) Os demais datos que o Director do laboratorio municipal estime necesarios para proceder á liquidación dos prezos públicos correspondentes.

2. A dirección do laboratorio municipal poderá abrir os libros ou rexistros auxiliares que estime necesarios para a boa marcha dos servizos regulados na presente ordenanza.

### DISPOSICIÓN FINAIS

1ª. No non previsto nesta Ordenanza Fiscal será de aplicación a Ordenanza Fiscal Xeral do Concello, Lei 58/2003 Xeral Tributaria, e restante normativa de aplicación.

2ª. Esta ordenanza entrará en vigor o día da súa publicación no Boletín oficial da provincia e comezará a aplicarse o 1 de xaneiro de 2018, permanecendo en vigor en tanto non se acorden a súa modificación ou derogación expresas.

PUBLICACIÓNS B. O. P.: 30 DE DECEMBRO DE 1998  
30 DE DECEMBRO DE 1999  
27 DE DECEMBRO DE 2000  
30 DE NOVEMBRO DE 2001  
26 DE DECEMBRO DE 2002



30 DE DECEMBRO DE 2003  
29 DE NOVIEMBRE DE 2004  
7 DE DECEMBRO DE 2005  
30 DE DECEMBRO DE 2006  
10 DE DECEMBRO DE 2007  
10 DE DECEMBRO DE 2008  
11 DE DECEMBRO DE 2009  
14 DE DECEMBRO DE 2010  
22 DE NOVIEMBRE DE 2011  
21 DE DECEMBRO DE 2012  
30 DE OUTUBRO DE 2014  
7 DE DECEMBRO DE 2017